



## Komunikado di Prensa 2020-034

### **Kondishon di pago personalisá ta pèrmití pero na interes di stabilitat finansiero; Moratorio genérikó no ta rekomendabel mas**

Willemstad/Philipsburg – Pa redusí e impakto finansiero direkto di e krísis di coronavirus riba empresa i konsumidó individual, na mart di e aña akí, Centrale Bank van Curaçao en Sint Maarten (CBCS) a duna pèrmit pa e bankonan komersial ofresé nan klientenan moratorio di pago pa un periodo di tres pa seis luna. Esei a nifiká ku e bankonan por a duna nan klientenan dispensashon di pago di tantu kapital komo interes riba nan fianza durante un periodo determiná, sin ku esei afektá posishon finansiero di e banko en kuestion. Ademas, a permití e bankonan oumentá temporalmente e montante máksimo ku por fia un persona na proporsion di su entrada (e *debt-service ratio*).

Sin embargo, e konseshon akí na e klientenan ta presentá sierto riesgo pa e bankonan komersial mes, pa nan posishon finansiero den futuro i, komo tal, pa stabilitat finansiero. Pa e motibu akí, CBCS no ta permití mas pa e bankonan sigui otorgá moratorio na un manera genérikó, sin ku esei afektá e provishonnan ku e banko en kuestion mester tin. No opstante, e bankonan por sigui evaluá, pa kada kaso individual i konforme e reglanan di maneho vigente, kon nan por sostené nan klientenan ku ta enfrentando difikultat finansiero, sin ku nesesariamente esei mester afektá e provishonnan ku e banko en kuestion mester tin.

Ademas, CBCS a determiná ku no ta permití mas pa e bankonan komersial duna krédito ku ta surpasá e *debt-service ratio* total di 37 porshento. Di e manera akí, CBCS ke prevení dunamentu di krédito eksesivo na konsumidó i garantisá ku dunamentu di krédito na Kòrsou i Sint Maarten ta tuma lugá na un manera prudente.

Willemstad, 18 di novèmber 2020

CENTRALE BANK VAN CURAÇAO EN SINT MAARTEN